



Број/Број: 03-/4-50-1-10-23-14/9  
Сарајево/Сарајево: 31. 3. 2009. године

## ZAPISNIK

### 23. sjednice Zajedničke komisije za evropske integracije Parlamentarne skupštine BiH

Sjednica je održana 30. 3. 2009. godine, s početkom u 11, 30 sati.

Sjednici su prisustvovali članovi Komisije: Halid Genjac, predsjedavajući, Ivo Miro Jović, prvi zamjenik predsjedavajućeg, Drago Ljubičić, drugi zamjenik predsjedavajućeg, Azra Hadžiahmetović, Alma Čolo, Hilmo Neimarlija i Selim Bešliagić.

Opravdano su odsustvovali: Milica Marković, Rudo Vidović, Branko Dokić, Zoran Koprivica i Šemsudin Mehmedović.

U ime Vijeća ministara BiH, sjednici je prisustvovala Amela Alihodžić, zamjenik direktora DEI.

Prisustvovala su Vlatka Dangubić, sekretar Komisije, i Vladana Lučić, stručni saradnik u Komisiji.

Komisija je jednoglasno usvojila sljedeći

## DNEVNI RED

1. Usvajanje Zapisnika 22. sjednice Komisije;
2. Razmatranje Izvještaja o radu Vijeća ministara BiH za 2008. godinu;
3. Tekuća pitanja;

## **Ad. 1. Usvajanje Zapisnika 22. sjednice Komisije**

Zapisnik 22. sjednice Komisije usvojen je jednoglasno.

## **Ad. 2. Razmatranje Izvještaja o radu Vijeća ministara BiH za 2008. godinu**

U uvodnom izlaganju Halid Genjac je, pozivajući se na odredbe Ustava BiH (član V.) i poslovnika Doma naroda (član 156.) i Predstavničkog doma (član 163.), po kojima Vijeće ministara BiH podnosi izvještaj Parlamentarnoj skupštini BiH, konstatirao da Izvještaj o radu Vijeća ministara BiH za 2008. godinu nije, ni svojom formom a ni sadržajem, u skladu s poslovnicama. Naime, Vijeće ministara BiH je na 75. sjednici, održanoj 5.2.2009., razmotrilo i usvojilo pojedinačne izvještaje o radu ministarstava BiH za 2008. godinu, te zaključilo da se ona objedine i dostave PSBiH kao Izvještaj o radu Vijeća ministara BiH za 2008. godinu. Osim toga, analizom izvještaja ministarstava i drugih institucija u okviru Vijeća ministara BiH, a da pritom nedostaju izvještaji nekih veoma važnih agencija i institucija, može se uvidjeti da je korištena potpuno različita metodologija prilikom izrade izvještaja, tako da su neki izvještaji veoma detaljni, a drugi veoma uopćeni.

Usljedila je rasprava u kojoj su svi prisutni izrazili negativno mišljenje na Izvještaj o radu Vijeća ministara BiH za 2008. godinu.

Ivo Miro Jović rekao je da je očekivao da u Izvještaju bude konstatiran zastoj na putu BiH u Evropsku uniju, obrazloženje šta je dovelo do tog zastoja i prijedlog mjera za ubrzanje procesa evropskog integriranja;

Drago Ljubičić naglasio je da Izvještaj ne daje odgovor na pitanje usaglašenosti zakona BiH sa zakonima EU, čak ni stepen usaglašenosti do sada usvojenih zakona;

Selim Bešliagić skrenuo je pažnju na neaktivnost pravosudnih organa radi kojih su bosanskohercegovački građani zatočeni unutar regije Balkana jer se procesuiraju izvan BiH, također je naveo primjer Zakona o vodama koji je usvojen, ali nije ga moguće provesti jer nisu doneseni podzakonski akti;

Azra Hadžiahmetović govorila je o neuporedivosti Plana rada Vijeća ministara za 2008. godinu sa Izvještajem i problemu nerealiziranih planiranih aktivnosti, potrebi uspostavljanja efikasne komunikacije s entitetima po pitanju nadležnosti;

Alma Čolo predložila je da se u slučaju neriješenog pitanja nadležnosti angažira visoki predstavnik kao arbitar;

Drago Ljubičić rekao je da procedura usvajanja zakona mora biti u skladu sa specifičnostima zemlje i da zbog toga Vijeće ministara BiH mora voditi računa o nadležnosti prilikom pripreme prijedloga zakona.

Nakon provedene rasprave, jednoglasno je usvojeno sljedeće

**MI Š L J E N J E**

## **o Izvještaju o radu Vijeća ministara BiH za 2008. godinu**

Vijeće ministara BiH je na 75. sjednici, održanoj 5. 2. 2009., razmatralo i usvojilo pojedinačne izvještaje o radu ministarstava Bosne i Hercegovine za 2008. godinu, te zaključilo da ih je potrebno objediniti i dostaviti Parlamentarnoj skupštini BiH, kao Izvještaj o radu Vijeća ministara BiH za 2008. godinu (u daljnjem tekstu: Izvještaj).

Kolegij Predstavničkog doma PSBiH je, 19. februara 2009., dostavio Izvještaj Zajedničkoj komisiji za evropske integracije, s pozivom da Komisija razmotri Izvještaj iz svoje nadležnosti i dostavi svoje mišljenje.

Također, Kolegij Doma naroda PSBiH na 24. sjednici, održanoj 5. 3. 2009., razmatrao je Izvještaj i odlučio da ga dostavi Komisiji na daljnje razmatranje.

Zajednička komisija za evropske integracije razmatrala je Izvještaj i jednoglasno usvojila sljedeće zaključke:

**I. a)** Dostavljeni izvještaj nije izvještaj o radu Vijeća ministara BiH nego zbir izvještaja o radu ministarstava i manjeg broja agencija. Vijeće ministara BiH je, prema članu 163. Poslovnika Predstavničkog doma PSBiH i članu 156. Poslovnika Doma naroda PSBiH, obavezno dostaviti izvještaj o svom radu **najmanje jednom godišnje**.

**b)** Izvještaj o radu manjeg broja agencija je priložen, veći broj njih se i ne spominje, među njima i izuzetno važne (Direkcija za evropske integracije, Regulatorna agencija za komunikacije BiH, Agencija za unapređenje stranih investicija itd). Izvještaj bi morao sadržavati izvještaje o radu svih tijela, agencija, ureda.

**c)** S obzirom da su dostavljeni samo pojedinačni izvještaji o radu ministarstava i pojedinih agencija, nije moguće ustanoviti razloge kašnjenja odluka za čije je donošenje nadležno Vijeće ministara BiH (npr. kašnjenje finansijskih planova za IPA fondove u 2007. i 2008. godini, kašnjenje imenovanja nacionalnog koordinatara za IPA fondove itd.) Iz istih razloga nije moguće ustanoviti stepen ispunjavanja obaveza iz Sporazuma o stabilizaciji i pridruživanju i provođenja obaveza iz Evropskog partnerstva niti razloge kašnjenja u ispunjavanju tih obaveza. Također, nedostaje i zbirni izvještaj Vijeća ministara BiH o ispunjavanju obaveza iz Mape puta za liberalizaciju viznog režima.

**II.** Zbog navedenih razloga, Zajednička komisija za evropske integracije sugerira kolegijima oba doma da od Vijeća ministara BiH zatraže otklanjanje navedenih nedostataka, te da se nakon toga Izvještaj o radu Vijeća ministara za 2008. godinu razmatra na zajedničkoj sjednici oba doma, uz obavezno prisustvo svih članova Vijeća ministara BiH.

### **Ad. 3. Tekuća pitanja**

Članovi Komisije informirani su o zvaničnoj posjeti delegacije Parlamenta Slovačke, te da će ova delegacija imati sastanak sa Zajedničkom komisijom za evropske integracije PSBiH u četvrtak, 2. 4. 2009. , kao i o pozivu na večeru koju organizira Joachim Schmidt, ambasador Njemačke, u čast članova Bundesrata. Svi članovi Komisije pozvani su da prisustvuju planiranom sastanku i večeri.

Sjednica je završena u 13,30 sati.

Predsjedavajući  
Zajedničke komisije  
Halid Genjac